

VENDIM
Nr.69, datë 11.2.2011

**MBI MIRATIMIN E NDRYSHIMIT TË TË DHËNAVE TË PARAQITURA NË
KËRKESËN PËR MARRJE LICENCE NGA SHOQËRIA “REÇI KGM” SHPK,
LICENCUAR PËR SUBJEKTIN TELEVIZIV PRIVAT KABLLOR “TV KABLLOR
MIRDITA”**

Këshilli Kombëtar i Radios dhe Televizionit, i përbërë nga:

Endira Bushati	kryetare
Alban Karapici	zëvendëskryetar
Suela Musta	anëtare
Sami Neza	anëtar
Gent Ibrahim	anëtar (në mungesë)
Zylyftar Bregu	anëtar,

pasi mori në shqyrtim çështjen me:

OBJEKT: Shqyrtimi i kërkesës së paraqitur nga shoqëria “Reçi KGM” sh.p.k., licencuar për subjektin televiziv privat kabllor “Tv kabllor Mirdita”.

BAZA LIGJORE: Neni 7 pika 21, neni 22 dhe neni 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, i ndryshuar,

VËREN SE:

Shoqëria “Reçi KGM” sh.p.k., është licencuar nga Këshilli Kombëtar i Radios dhe Televizionit, me vendimin nr.485, datë 17.7.2006 të KKRT-së, për subjektin televiziv privat kabllor “Tv kabllor Mirdita”, duke u autorizuar të funksionojë si operator televiziv privat kabllor për të penetruar në qytetin e Rrëshenit.

Personi fizik z.Pëllumb Taka është licencuar nga Këshilli Kombëtar i Radios dhe Televizionit me vendimin nr.271, datë 30.9.2004 të KKRT-së, për subjektin televiziv privat kabllor “Tv kabllor Lissus”, duke u autorizuar të funksionojë si operator televiziv privat kabllor për të penetruar në qytetin e Lezhës. Me vendimin nr.142, datë 22.10.2010 të KKRT-së, është miratuar rinovimi i licencës së këtij subjekti për një periudhë tjetër 6-vjeçare.

Me shkresën e depozituar në KKRT në datën 20.12.2010, nga ana e subjektit televiziv privat kabllor “Tv kabllor Mirdita” është paraqitur në KKRT kërkesa për miratimin e disa ndryshimeve të ndodhura në këtë subjekt televiziv. Subjekti njofton se nëpërmjet kontratës së shitjes, të datës 20 nëntor 2010, z.Pëllumb Taka, licencuar nga ana e KKRT-së, për operatorin televiziv privat kabllor “Tv kabllor Lissus”, ka shitur aktivitetin e tij te shoqëria “Reçi KGM” sh.p.k.

Bashkëlidhur kërkesës, subjekti ka paraqitur kontratën e shitjes së nënshkruar para noterit, ekstraktin e regjistrimit tregtar të datës 19.11.2010, për shoqërinë “Reçi KGM” sh.p.k., dhe ekstraktin e regjistrimit tregtar të po kësaj shoqërie të datës 2.12.2010, ku është pasqyruar ndryshimi në objektin e veprimtarisë, duke shtuar edhe veprimtarinë si “Tv kabllor Lissus” në qytetin e Lezhës.

Sipas kontratës së shitjes depozituar, bashkëlidhur shkresës njoftuese, rezulton se shoqëria blerëse “Reçi KGM” sh.p.k.:

“Shoqëria blerëse “Reçi KGM” sh.p.k., merr përsipër vazhdimin e të gjitha kontratave me të tretët, të lidhura deri në datën 20.11.2010 nga ana e z.Pëllumb Taka...”

Si dhe,

“Shoqëria “Reçi KGM” sh.p.k., do të bëjë veprimet e duhura për transferimin e licencës së “Lissus Kabëll” në KKRT, në emrin e shoqërisë “Reçi KGM” sh.p.k...”.

Mbështetur në nenin 22 të ligjit nr.8410, datë 30.9.1998 “Për radion dhe televizionin

publik e privat në Republikën e Shqipërisë”, të ndryshuar: “Licenca e transmetimit është e patjetërsueshme dhe vlen vetëm për subjektin të cilit i është dhënë. Në rast se mbajtësi i licencës hyn në marrëdhënie juridike civile, objekt i të cilave është veprimtaria radiotelevizive e licencuar, atëherë për cedimin ose kalimin e të drejtave që burojnë nga licenca kërkohet miratimi i Këshillit Kombëtar të Radios dhe Televizionit. Subjekti që ka fituar këto të drejta miratimi i jepet në formën e një licence të re me të njëjtën përmbajtje. Kur Këshilli nuk e miraton kalimin për shkaqe të parashikuara në këtë ligj, i ofron frekuencat që i përkasin kësaj licence për një konkurrim të ri kandidaturash”.

Në mbështetje të nenit 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar: “I licencuari detyrohet të njoftojë Këshillin Kombëtar të Radios dhe Televizionit për çdo ndryshim të të dhënave që ka paraqitur në kërkesën për marrjen e licencës..dhe arsyet përkatëse, paraprakisht dhe në çdo rast, jo më vonë se 15 ditë pas bërjes së këtyre ndryshimeve...”

Nëpërmjet kontratës së shitjes së aktivitetit, subjekti i licencuar nga KKRT-ja, “Tv kabllor Lissus”, ka hequr dorë nga të drejtat që burojnë nga licenca e transmetimit, prandaj subjekti që i ka fituar ato, ka paraqitur kërkesë për miratimin e këtij ndryshimi, konform parashikimit ligjor.

KKRT-ja konstaton se subjekti që ka fituar të drejtat nëpërmjet kontratës së shitjes është një subjekt, i cili është licencuar nga KKRT-ja, prandaj miratimi i kërkuar nga neni 22 i ligjit, nuk do të bëhet në formën e dhënies së një licence të re transmetimi, por përmes ndryshimit të të dhënave të paraqitura në kërkesën për marrje licence nga subjekti televiziv privat kabllor “Tv kabllor Mirdita”.

Sa më sipër, KKRT-ja e gjen të drejtë e të mbështetur kërkesën e paraqitur nga subjekti televiziv privat kabllor “Tv kabllor Mirdita”.

PËR KËTO ARSYE,

Këshilli Kombëtar i Radios dhe Televizionit, në mbështetje të nenit 7, pika 21, nenit 22 dhe 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar.

VENDOSI:

1. Miratimin e ndryshimit të të dhënave të paraqitura në kërkesën për marrjen e licencës nga shoqëria “Reçi KGM” sh.p.k., licencuar për televizionin privat kabllor “Tv kabllor Mirdita”.
 2. Kalimin e të drejtave të licencës nr.018/RTV kabllor, shoqërisë “Reçi KGM” sh.p.k., licencuar për televizionin privat kabllor “Tv kabllor Mirdita”.
 3. Zgjerimin e zonës së licencimit të subjektit televiziv privat kabllor “Tv kabllor Mirdita”, në qytetin e Lezhës.
 4. T’i heqë subjektit, person privat fizik, z.Pëllumb Taka, licencën për televizionin privat kabllor “Tv kabllor Lissus”.
 5. Licenca nr.018/RTV kabllor bëhet e pavlefshme.
 6. Ngarkohet administrata e KKRT-së për veprime të mëtejshme.
- Ky vendim hyn në fuqi menjëherë dhe botohet në Fletoren Zyrtare.

KRYETARE
Endira Bushati